

8カ

科

鐵

鏡

幼 科 鐵 鏡

編 者：

清（貴池）夏

鼎

出版者：

江蘇廣陵古籍刻印社

發行者：

揚州市古籍書店

定 價：

玉扣紙本 六元三角

白棉紙本 八元八角

出版時間：

一九八〇年十一月

書 號：

八〇一一二四

幼科鐵鏡卷之四

貴池夏 鼎禹鑄

痲症

夏禹鑄曰痘出於臟痲出於腑痲乃大腸主之毒氣蒸肺故發咳嗽先輩書未嘗齒及痲症蓋以其輕而忽之也卻不知表症雖輕毒侵肺腑亦多與鬼爲鄰余經歷甚衆費手居多因不惜筆力詳著於篇以杜嬰兒痲症之患流行痲症其候燒熱必發咳嗽聲必稍啞面皮微有腫樣兩腮顏色微紅此吉兆也如發出不快及不透發或紅點見面偶挾風邪而隱或醫人不知誤除燒熱隱而不見腹內作痛治之神莫神於天保采薇湯聖莫聖於天保采薇湯祇須一服即發出或有不盡發者再加一服從末有不效者如肺臟先虛又加大腸毒氣攻肺面皮像澆薄的式子慘白

浮上光光溜溜便是肺氣已絕在精威二穴對挈其聲不出必是死症藥之無濟

有麻方見點隨即收入或瀉青水審非風寒爲害唇色慘白口氣微微此乃內虛不能送毒不可分利止瀉惟用八珍湯六九以託之外用蔥半斤許白酒煎徧身擦之如再不透發祇額上稍見些微惟用六君子湯九循循調治自愈有麻初發熱時心火盛極刑尅肺金致麻不出必先黃連木通等分服之再用防風荆芥葛根升麻南星枳殼赤芍桑皮柴胡桔梗甘草煎服之即發

有痢疾兼麻症若麻見點急用香薷桔梗枳殼黃連厚樸木通升麻赤芍車前煎服麻瘡透發而治痢疾此棄輕從重之說不可不知

本邑陶一公涯玉之子麻症發熱方兩日醫人誤爲除熱

麻伏不出形狀似驚差役請余治面色花雜喘急不嗽必有內毒於太陽穴以口涎擦之皮內隱有紅點知是麻毒內攻無燒不出用天保采薇湯倍加升麻乾葛一服額上見點色不紅起面色唇口慘淡無澤知爲內虛即用固真湯一服通身發熱陶公驚怖余曰麻非帶熱不出仍服天保采薇湯一劑通體透發愈此見面色花雜便知內毒之一驗也

培繼樓同學庠友方恒綏一子麻症隱而不出形症甚凶邀余治見其面色慘白口氣微冷唇舌淡白大便泄瀉即用八珍湯一服額稍見點恒綏因姪前麻症殞於泄瀉力迫止瀉余曰分利更虛不允見口吻間覺以瀉關性命勉強用五苓散果止而額上紅點即隱又用十全大補湯內託外用葱酒蒸引卒不透發余值事往郡躡後札示皮上

每發一泡破即成黑窟附他醫攻毒方單余札復曰肌肉脾屬破即成窟乃脾虛之極何可攻毒惟用六君子湯顧脾爲主果效此望色審竅萬無一失分利虛脾即此可見之一驗也

思誠堂同學友措大方薪衍第五郎患痧症初醫者不知痧候用六一散以除燒熱邀余過治見其舌純紫兩唇燥裂大小二便皆祕聲嘶不已即用黃連八分木通黃柏各一錢服下大便刮白如冷痢然在座者口吻覺爲涼劑所致余亦踟躕滿志豈臟腑苗竅此症獨不相符毫不首鼠問前醫退熱所用何劑薪衍曰六一散余便恍覺下元爲六一寒冷所滯致火不降灼無疑矣隨以炒鹽久熨臍下仍用前味黃連倍加服之方下大便燥結與黑棗無異可見苗竅辨真治定不爽之一驗也

辨傷風寒

附寒極似熱

小兒之十指俱冷以三指按額俱熱身壯熱面赤而淡不動必掣此傷寒之症也表散法開天門分陰陽推三關體厚則大發其汗揉太陽並外勞宮運八卦推艮入坎症輕推之自愈重則用元宵火定之體弱隨發汗隨止女反是治用芎蘇飲六十服之

有寒極似熱者面色紅如水紅桃花口渴而脣不乾燥舌不紅紫大便秘青小便清長此寒極也似熱者因面有紅色口有渴形故也治之與前法同

如口作渴大便秘小便赤是內有熱而外傷寒也宜先表外而後清裏爲主表用芎蘇飲六十裏用白茯苓半夏陳皮連翹木通枳殼甘草煎服

本郡田三公祖之公孫方二歲抱風寒燒熱症郡醫見燒

有驚悸便作驚症治數日不愈余以三指按額俱熱兒十指俱冷用芎蘇飲一劑留飲席未解內小童報曰小相公熱退矣此燒有表裏不可不辨之一驗也

余於癸丑科會試 盛京有鑾儀衛正堂許公乃孫方歲半患傷寒症初延太醫院幼科失表後於朝房內余同里員外郎陳是菴道及於余即日來貴池館親邀往治但見身冷如冰痕毛差差面色慘晦不知人事知寒邪內伏用天保采薇湯一劑囑曰夜發熱則明日來治不則莫可如何矣夜果發熱仍用前湯一劑熱又解許曰發熱退熱藥同效異真出奇也余曰尋常症在表感一劑便解如令公孫邪被藥誤伏內昨一劑攻邪邪到肌表表見邪自是作熱仍以原方加追一劑表解熱除無甚奇也許曰前是菴備道年翁乃幼科白眉今若此洵名下無虛矣以百金壽

余辭曰晚兩代治救嬰兒從不受謝一文再四面壁更欲延請入太醫院又辭曰老母在堂晚在都門白雲頻望承盛意心領之可矣許乃止此關門殺賊之一驗也

方伯張存儒初生有公郎抱驚風患初郡中醫作夾食用消導劑症加甚後余用半夏四錢生薑一錢防風二錢一服即愈遂拜余爲假父此藥用當而通神之一驗也

余邑張中尊嫜患病邑中醫曾治十餘日不愈會余到邑中尊得聞接余治婢方抱出離座五六步外望見面上光光浮浮毫無寶色余曰不須抱近請回中尊問症若何余曰肺氣已絕不可治矣明日果死此望色而知爲死症之一驗也

辨夾食傷寒

小兒十指俱熱我按兒額三指俱冷其候身熱或吐或瀉或

不吐瀉口必惡食腹必浮脹拍如鼓聲或作痛是也推法
開天門分陰陽男女同男重揉太陽發汗體弱揉太陰止
之女反是推上三關三十退腑六七下運八卦重揉艮宮
於大指面旋推補脾曲兒小指重揉外勞於第二指大腸
位側推到虎口以止瀉不瀉不推重按掐中指一節以止
吐不吐不掐於左腳湧泉穴左轉揉之止瀉不瀉不揉少
頃右轉揉之止吐不吐不揉女則右轉右揉止瀉左轉左
揉止吐推畢即用燈火臍輪四焦胸口一焦用水酒麴一
枚火煨黃色研末白湯送下即愈重則用消導二陳湯十
九加柴胡紫蘇等味煎服

珩山孝廉方韻皇乃孫發吐燒熱微掣吐輕熱重余子壻
方平階初業斯道投天保采薇湯一劑不效邀余一見知
爲內傷飲食外挾風邪用藿香正氣散一服即愈余以湯

名曰天保采薇取其治外治內之意用之不當雖多奚爲
在余婿以爲症屬內傷外感湯屬內外並治渠見不爲非
是然不知症似社鼠城狐重鎮何可輕發此學者之所宜
知而宜慎也

辨腹痛

腹痛臍以上屬火臍以下屬寒其因不一有寒痛熱痛傷食
痛積滯痛氣不和而痛脾虛而痛肝木乘脾而痛蛔動而
痛數種寒痛則面白口氣冷大便青色小便清利痛之來
也迂緩而不速疾綿綿不已痛時以熱手按之其痛稍止
肚皮冰冷是也推法曲兒小指重揉外勞宮推上三關揉
臍五十藥用乾薑肉桂等分煎熱加木香磨水入服之自
愈

熱痛則面赤口氣熱口渴唇紅大便秘小便赤時痛時止痛

來迅厲腹形如常不腫不飽彈之不響以熱手按之其痛愈甚肚皮滾熱此真熱也推用下六腑水底撈月蓋熱痛主心脾兩熱用燈心車前伏龍肝加木香磨水稍許入服傷食痛者必惡食眼胞必浮腫或瀉下酸臭腹必飽脹彈如鼓聲或身作熱是也如氣不旺者不宜取瀉祇用消導二

陳湯十九

積滯痛者今日傷明日傷逐日傷之而滯於脾胃間不以飲食得其傷不痛既有滯而後以乳食傷碍故痛也面色黃噯氣酸大便酸臭便後痛減足冷嗜卧不思飲食是也治宜枳殼檳榔木香下之下後即以小異功散十六補之氣不和而痛者兒下地後或地多濕兒臍受風以裹肚束臍過緊不知兒體漸長束帶未鬆則上氣不通下氣以故內氣不和故作痛也審其非寒非熱問其母而臍果有束縛

之弊則氣不和之痛必矣治以木香磨水服之隨用燈火
臍輪六焦臍下氣海一焦心口窩一焦其痛即止大兒之
氣不和者其候眼胞不腫面色不黃飲食如故腹腫可如
鼓聲搖其頭而愛氣是也宜用木香陳皮枳殼甘草服之
脾虛痛者其候面無血氣微黃帶微白大便少而色白治以
補脾開胃為主用六君子湯九加橘皮

肝木乘脾痛者肝木尅脾脾虛不勝其尅則肝氣無所洩故
乘脾之衰而作痛也其候唇白口中色淡面多青色痛則
腹連兩脇重按其腹則痛止起手又痛是也治用四君子
湯三十加柴胡白芍

蛔痛者腰曲撲身口流清涎痛久不歇少頃又痛或一時或
二時而止或歇半日又痛面黃唇白此蛔痛也治用使君
子去殼火煨喫十餘粒少頃又喫即止以上嬰兒腹痛口

不能言何以知之蓋兒痛必哭無故而哭者痛也哭聲雄慘而雙眉蹙皺是也如使君子食之不止莫妙於苦楝子樹根皮約一二兩許水煎一茶鍾喫下蟲即盡出但體弱者不可輕用

又有一種奇痛一痛只大叫幾聲痛痛痛即抱胸暈死余家一婢犯此症先君在日余見將婢面撲地用冷水一盆以婢膝着水上於委中穴澆水狠拍粗筋腫起用銀鍼傍筋打入二鍼鍼出血流叫一聲痛即甦隨用冷水滾水各半連喫一二碗立愈記先君曰此急痧也與轉筋火差似如平常腹痛從未有一痛而即死者急痧之辨緊記在此夏禹鑄曰嘗觀內經有曰胃虛則吐胃熱則嘔此說殊屬大謬何也余屢屢見吐吐固有虛常亦有熱嘔固是熱卻亦有寒此匪余非議前人蓋見之多而治之效也二症各有

虛熱不可拘執惟望面色唇舌之間紅則熱而淡則虛斷無有誤至於泄瀉出少而緩曰泄出多而勢急曰瀉泄則症輕瀉則重凡以所瀉之色驗之治無不效

辨吐

胃虛發吐其候面白神疲不熱不渴口氣溫和而帶微冷額前微汗治宜助胃膏二十二

胃熱發吐面赤唇紅煩渴溺赤口氣蒸手宜用熟石膏七分八分研細末神茶送下

胃氣不和發吐其候惡食此由積滯在胃復爲傷食搗兒之頭使噁氣治用火酒麴一枚火煨黃色研細白湯調下用枳殼木香陳皮半夏香附服之

有盛夏外感暑氣吐者宜六和湯二十
有霍亂而吐者吐不出者手足厥冷臍腹之上絞痛名曰轉

筋火治用滾水一碗冷水一碗相和飲下即愈

有內傷飲食外感風邪而吐者身熱眼燒疲倦治用藿香正氣散〔七十〕

有傷風嗽吐者治用清金飲〔五八〕

辨瀉

夏禹鑄曰吐從面色辨之不爽瀉更宜辨所瀉之色暴傾下迫屬火水液澄清屬寒老黃色屬心肺脾實熱宜清淡黃色屬虛熱宜補青色屬寒宜溫淡白色屬脾虛宜補醬色屬濕氣宜蒼朮燥濕酸臭屬傷食宜消導二陳湯〔十九〕

脾虛作瀉瀉下白色或穀食不化或水液澄清其候面白神疲脣口慘淡舌白口氣溫冷治宜理中湯〔五〕加附子或六君子湯〔九〕

脾熱作瀉瀉時暴注下迫便黃溺赤口氣蒸手煩渴少食治

宜五苓散干八加山梔仁

有氣虛下陷瀉者宜補中益氣湯其候與脾虛差同

有傷食兼滯瀉者其候噯酸氣吞酸脹滿一痛則瀉一瀉痛減治宜用大腹皮神曲麥芽山查白朮木香檳榔如食已消痛已止而瀉不止者乃脾失清升之氣宜補中益氣湯
〔三七〕若食消而腹猶痛乃脾痛也宜小異功散
〔十六〕有肝瀉者瀉青稠粘乃肝木乘脾治宜麥冬桔梗白朮白茯苓人參木香酸棗仁甘草

先瀉數日已止又瀉隨發驚此症多不可治蓋瀉而又瀉脾敗之極加之外邪由肺尅肝肝又動風尅脾脾敗將死不受肝尅故肝風烈極毫無泄處如祛風解熱元氣將盡將謂療驚不能救脾將謂救脾驚不能止無法可治

辨吐瀉